

Misteres, aventures e creatures

L nef liber fascian de Alberta Rossi é stat prejentà a Soraga l di di Sènc Piere e Paul per endrez de l'Union di Ladins, con n belot spetacol di animatores »Picoi da mont« de Marijene

Cognoscede duc l Salvan, la Bregostèna, la Stria, la Vivèna e l Pelendron? Fosc l'ultim no, che? L Pelendron defat l'é dassen pech cognosciù, ma ence chest l'é un di personajes che Alberta Rossi à cernù fora per sie liber "Misteres, aventures e magica creatures", che é stat prejentà a Soraga l di di Sènc Piere e Paul per endrez de l'Union di Ladins de Fascia e... pissave: per l'ocajion duta chesta fegures se à prejentà de persona sun paladina de La Gran Ciasa! No ge cherdede? Ades ve conte dut, ma cognon jir con orden...

Sun paladina dantfora l'é ruà la giornalista Monica Cigolla, che ge à dat sobito la parola al vizeombolt de Soraga Valerio Pederiva e al president de l'Union di Ladins de Fascia Fernando Brunel... ence el da Soraga, desche Alberta... donca no podea esser auter che na sera strionèda...

Pederiva à abù paroles de lauda e ringraziament per sia sentadina Alberta Rossi e per l'Union di Ladins, palesan la speranza che chesta scomenzadives posse didèr a arvejinèr la jent a nosc bel lengaz, e ence Brunel ge à sport n bel develpai a l'autora, che à volù meter jù sia publicazion ence per ladin, jontan ite coscita n auter tassell a la publicazions che ti egn l'Union, l'Istitut e l'Olfed de la Scola de Fascia à metù ensema per ge sporjer vèlch da gustegol per fascian ai picoi sentadins del davegnir.

Dapò, travers n curt dialogh con Alberta Rossi, Monica Cigolla à didà l publich a descorir l'autora, con sia pascion fin da picola per l lejer e l scriver che ades la porta inant te libes e te n blog, e ence l contegnù de chel che no l'é demò n liber de conties, ma ence n picol scrign che ne fèsc descorir paijes, curiosità, tradizions e sorainomes de noscia val. Alberta à ringrazià l'autora di dessegnes del liber, Elena Corradini, ma ence na lingia de autra persones che l'à didèda a troèr fora vèlch particolarità de ogne paisc de Fascia e a la meter jù te chela varianta.

Dapò, desche per encant... i personajes del liber é rué sun paladina...



L'autora del liber Alberta Rossi en dialogh ensema a la giornalista Monica Cigolla.



I »Picoi da mont« animatores de Marijene sun paladina a la fin del spetacol con l regist David Dorich.

Marijene! Che creatures certes! Dijaane al scomenz: cognoscede duc l Salvan, la Bregostèna, la Stria, la Vivèna e l Pelendron?

Siede segures?

Ence David Dorich, regist e ator di Bontemponi, l cherdea de i cognoscer; l'aea te man l liber e l'à tacà a i chiamèr un a l'outa sun paladina per ge i fèr cognoscer a la jent te sala, ma canche l li à vedui ruèr l'aessa neto volù se meter la mans ti ciavei... se l li aessa abui!

L Salvan era regolà da d'istà con veières da soreie e braa curta, la Stria cativa duta zevila e chela valenta che ciapèa a peèdes l cian, la Bregostèna che ninèa l picciol, la Vivèna che fajea selfie e l Pelendron regolà da balerina che balèa su la pontes... Na na, l se à dit... chiò l'é zeche che no passenea... Bon che

fosc i Sènc Piere e Paul... o fosc vèlch Strion da Soraga... i à vardà jù, e coscita chisc 6 fegures é vegnui de return sun paladina, enstouta con quant e fèr che passenèa trop de più con chel che la conties ne insegna. L Salvan fort e pelous che vif tel bosch, la Vivèna doucia e jentila... e de auter no ve dijon, ajache podede l descorir apontin tel liber de Alberta!

Ve dijon demò che l grop de "Picoi da mont", animatores de Marijene, i é stac dassen n muie bravi a spilenèr a dapò ence a balèr su la notes de la bela ciantia ladina de Marco Mattia e Biju Vadagnini. A duc i atores, al regist David Dorich e se sà ben ence a Alberta, l publich ge à fat n gran e fort batiman!

Lucia Gross

L LIBER

Fascia anter realtà e fantasia

"Canche é tacà a scriver chest liber volee me oujer soraldut ai più picoi e a chi che à a cher l'ambient e l melaur de vigni cultura e con ic volee descorir mingol più davejin Fascia e duta soa ricchezza." Coscita scrif Alberta Rossi te la prejentazion de sie nef liber per ladin dal titol "Misteres, aventures e magica creatures. La val de Fascia anter fantasia e realtà". N liber che, a la dir duta, no se ouc demò ai più picoi ma l'é n melaur da descorir ence per i più gregn. Orir la piate de chest liber da la soracuerta rosola l'é desche orir n mond misterious, da la saor magica, n mond olache vif stries, bregostènes, salvans e vivènes, n mond che purampò partegn a la jent de Fascia, olache sia stories se ciola ite te cheles de chesta magica creatures. L'é conties de jent che cognosc sia tera e che ge vel ben, che la conta, che la cianta, che la vif te ogne sie moment e con ogne sie secret. La sà inout i inomes de duc i ciantons, la fraziions, i pre e la veres, e la sà coche la cogn i lurèr e i rencurèr. L'é jent leèda e sia tradizions, a sia usanzas, a sia devozion.

Tres la piate de chest liber se viaja anter fantasia e realtà e dut doventa nef, cognosciù, magich. Apede a la conties eventèdes da l'autora se pel cognoscer i sorainomes de la jent de duc i paijes e fraziions, i toponimes di lesc de Fascia e veder olache i é, la tradizions veiores, i secrec più sconec. Se pel lejer e sentir l son di idiomes de duc i paijes e apede



La soracuerta del liber per ladin de Alberta Rossi.

chel del fascian standard. N liber che a chesta vida doventa ence n strument didatich per la scoles. L'é gustegol, sori da lejer, curious.

Dò l'edizion per talian vegnuda fora l'an passà, Alberta l'à volù l scriver ades dut per ladin percheche l'é sie lengaz, chel del cher. I dessegnes che fèsc più rich l liber é de Elena Corradini, la prejentazions é de Cristina Donei, Brunamaria Dal Lago Veneri e Mirella Florian. L liber é da poder comprèr te senta de l'Union di Ladins de Fascia a Sèn Jan. La conties de Alberta é states toutes sù ence da Anna Mazzel per na lingia de programes radio per la RAI olache la oujes di personajes é states interpretèdes da n bel grop de jent de duta Fascia. La pruma trasmiscion va fora en mercol ai 10 de messèl da les 19:05 e dapò ogne 15 dis semper de mercol. I programes é da poder scutèr ence su www.raibz.rai.it railadinia, radio mediateca o podcast.

Monica Cigolla